

**Isumaginnittoqarfiup aqunneqarnera aqqissuussaanelu pillugit Inatsisartut peqqussutissaatut siunnersuummut nassuiaatit**

**Nassuiaatit nalinginnaasut**

Peqqussutissatut siunnersuut manna kommunalbestyrelsip aalajangiinerata Isumaginninnermi Naammagittaalliuuteqartarfimmut naammagittaalliuutigineqarsinnaanerani erseqqissaataasumik imaqarpoq, taamaalilluni nalornissutaasariaarutissalluni kommunalbestyrelsi sinnerlugu politikikkut imaluunniit allaffissornikkut aalajangiisoqarsimappat Isumaginninnermi Naammagittaalliuuteqartarfimmut naammagittaallioqarsinnaasoq.

Taamatuttaaq aalajangersakkamik nutaamik ilanngussisoqarpoq, tamatumani Naalackersuisut kommunini ataatsimiititalianik sulianik isumaginninnermut tunngasunik suliaqartartunik pikkorissartitsisarnissaannik periarfissiisumik. Tamanna pivoq ataatsimiititaliat aalajangiisarnermi tunngavissaannik nukittorsaaaviginiarlugit.

Isumaginninnermi Naammagittaalliuuteqartarfimmi suliassanik suliarinnittarnerup agguaqatigiisillugu sivissusaa sivikillisarnerlugu suliassaq Isumaginninnermi Naammagittaalliuuteqartarfimmut saqqummiutinngikkaluarlugu siulittaasup aalajangiisnaanerani siunnersuummi periarfissinneqarpoq.

Taamatuttaaq suliassat allakkatigut suliarineqarsinnaanerani periarfissinneqarpoq.

Paasiuminarsaaniarluni inatsisartut peqqussutissaattut nutaatut siunnersuut saqqummiunneqarpoq peqqussutip atuuttup allannguutissaatut pinnani.

Allannguutit uani taaneqartut eqqaassanngikkaanni isumaginnittoqarfiup aqunneqarnera aqqissuussaanelu pillugit Inatsisartut peqqussutaannut nr. 9-imut, 30. oktober 1998-imeersumut atuuttumut naleqqiullugu allannguivinnissamik eqqarsaateqartoqanngilaq.

Makkua tusarniaavigineqarsimapput:

KANUKOKA kommuninut tusarniaanissamik qinnuigineqarluni  
Sulineramik Inuussutissarsiuteqartut Kattuffiat  
Isumaginninnermi Naammagittaalliuuteqartarfik  
Aqutsinnermut Pisortaqarfik

Aningaasaqarnermut Pisortaqarfik  
Nunap Iluani Pissutsinut Allaffik  
Nunap Immikkoortuini Allaffiit Ilulissani Qaqortumilu  
Ulloq unnuarlu angerlarsimaffinnut Allaffik  
Tusilartunut Siunnersuisoqarfik  
Danmarkimi Allaffik isumaginninnermut immikkoortortaqaarfik

Isumaginninnermi Naammagittaalliuuteqartarfiup allattoqarfia allannguutissatut siunnersuutunik saqqummiussisimavoq, siunnersuummullu sapinngisamik ilanngunneqarsimapput. Tamatuma saniatigut tusarniaanermut akissutit allannguinnissamik pissutissaqalersitsisimangillat.

*Allaffissornikkut aningaasatigullu kingunerisassat*

Siunnersuut Isumaginninnermi Naammagittaalliuuteqartarfimmuut oqilisaanerup saniatigut allaffissornikkut kinguneqassangatinneqanngilaq.

Aatsaat pikkorissaanissamik neqerooruteqarnissamik aalajangiisoqarpat siunnersuut aningaasatigut kinguneqassangatinneqarpoq. Taamaattoqassappallu aningaasartuutissat 1 mill. koruunit missaanniissagatinneqarput. Pikkorissaanissat ukiut sisamakkaarlugit kommunalbestyrelsimut qiniisisoqareernerini neqeroorutigineqarsinnaapput. Pikkorissaanissat neqeroorutigineqarsinnaapput aatsaat tamatumunnga Aningaasanut Inatsimmi aningaasaliisoqarsimappat. Taamaattoqassappallu tamanna 2004-imi isummerfigineqassaaq.

## **Aalajangersakkanut ataasiakkaanut nassuiaatit**

### *§ 1-imut*

§ 1, imm. 1-imi aalajangersagaq peqqussummi atuuttumi § 1-mut assinguvoq.

Aalajangersagaq Naalackersuisut isumaginnittoqarfimmik aqutsinissaannik aaqqissuussinissaannillu oqartussaaffiliivoq, kiisalu kommunit isumaginninnermi malittarisassanik malin-ninneranik nakkutilliisinnaatitaanerannillu imaqarpoq. Isumaginninnermi malittarisassat paasi-neqassapput ilaatigut tassaasutut inatsisitigut najoqqutassat assigiinngitsut. Taamaalillunilu tassa periusaasartut, inatsiseqarnermi ileqqusartut pisullu qanoq issusaa isumaginninnermi malittarisassanut ilaapput. Isumaginninnermut naalackersuisoq nakkutilliinnermut akisussaasuvoq.

Nakkutilliinerup malitsigaa Naalackersuisut isumaginninnermut tunngasunik kommunit sulianik suliarinnittarnerata pitsaassusaanik naliliisinnaammata. Assersuutigalugu kommunit nipangiussisussaataitanerminnik, naammagittaalliornissamut ilitsersuisussaataitanerminnik il.il. malinninnerannik naliliinerit pineqarput, imaluunniit kommunit missingiinnermini inatsisitigut eqqarsaatigisariaqartut tamaasa ilanngussimaneraat.

Assersuutigalugu Naalackersuisut isumaqarpata kommuni soorlu isumaginninnermut tunngasunik isumaginninnermini sulianik suliarinnittarneq pillugu inatsisinik unioqqutitsisimasoq, pisut uparuarneqarsinnaapput kingornalu Kommunit Nakkutilliisoqarfiannut tunniunneqarsinnaallutik. Uparuaaneq taamaallaat innersuussutinik imaqarsinnaavoq, peqqussutaanngitsunik pineqaatissiissutaanngitsunillu. Nakkutilliineq aamma kommuninut killilimmik ilitsersuisussaataitanermik malitseqarpoq. Taamaaliornikkut sulianik suliarinnittarnerup pitsaassusaa qaffatsinneqassaaq.

Imm. 2-imi piginnaatitsissummik aalajangersagaq nutaajuvoq pingaartumillu nakkutilliisut ulluunerani unnuaanerani paaqqinnittarfinnik nakkutilliinissaanni aalajangersaanissamut atorneqarnissaa naatsorsuutigineqarpoq. Naatsorsuutigineqarpoq nakkutilliisussat tassaassasut kommunip, ineqartut qanigisaasa peqqinnissaqarfiullu aallartitaat.

#### *§ 2-mut*

Aalajangersagaq peqqussummi atuuttumi § 2-mut assinguvoq, allannguuteqartitsisoqavinnissaalu eqqarsaatigineqanngilaq.

Naalackersuisut kommunit sanaartornermut tunngasunik pilersaarussiaat pillugit paasisutissanik pissarsiniartassapput. Tamanna pisassaaq sanaartornikkut suliat Aningaasanut Inatsisikkut tapiiffigineqarnissaannik qinnutigineqartut tulleriiarneqarnissaat siunertaralugu. Aalajangersakkakkut Naalackersuisut tulleriiarisussaatinneqarput.

Aalajangersakkakkut aalajangiunneqarpoq piorsaanissamik pilersaarutit ukiunut sisamanoortuussasut. Ukiut sisamat ukiumut aningaasanut inatsiseqarfiusumut ukiunullu missingersuusiortfiusunut tunngasuupput. Piorsaanissamik pilersaarutit suliarineqartussat tassaapput isumaginninnermut naalackersuisoqarfiup Namminersornerullutik Oqartussat ukiunut sisamanut pingaarnerusutigut sanaartugassanut pilersaarutaanut ilanngussai. Sanaartornissamik pilersaarutit taakku sanaartornermut aningaasaliissutit pillugit siunnersuutinut tamarmiusunut tunngaviusarput, aningaasaliinissamik ukiumoortumik inatsisinut ilanngunneqartartut.

#### *§ 3-mut*

Aalajangersagaq peqqussummi atuuttumi § 3-mut assinguvoq, allannguuteqartitsisoqavinnissaalu eqqarsaatigineqanngilaq.

Aalajangersagaq Naalackersuisut §§ 1 aamma 2-imi suliassarititaasut isumagineranni kommuninit paasissutissanik naleqquttunik pissarsiniarsinnaatitaanerannik imaqarpoq.

#### *§ 4-mut*

Aalajangersagaq peqqussummi atuuttumi § 4-mut assinguvoq, allannguuteqartitsisoqavinnissaalu eqqarsaatigineqanngilaq.

Aalajangersagaq taanna isumaginninnikkut sanaartukkanut erseqqinnerusumik malittarisassiornissamut pisussaaffiliivoq. Peqqussut atuuttoq naapertorlugu isumaginninnermi piorsaaneq pillugu kaajallaasitaq nr. 213 saqqummersinneqarsimavoq.

#### *§ 5-imut*

Aalajangersagaq nutaajuvoq. Kommunini ataatsimiititalianut ilaasortanik isumaginninnikkut suliaqartartunut pikkorissaanissamik Naalackersuisut neqerooruteqarnissaannik periarfissiivoq. Ukiut sisamakkaarlugit kommunalbestyrelsimut nutaamik qinersisoqarneri tamaasa pikkorissartitsisoqarsinnaavoq. Pikkorissartitsinerit aatsaat pisinnaapput Aningaasaqarnermi Inatsimmi tamatumunnga aningaasanik immikkoortitsisoqarsimappat.

Kommunit ataatsimiititaliaasa isumaginninnikkut sulianik aalajangiisarneri nukittorsarniarlugit aalajangersagaq ilanngunneqarpoq.

#### *§ 6-imut*

Aalajangersagaq peqqussummi atuuttumi § 5-mut assinguvoq, allannguuteqartitsisoqavinnissaalu eqqarsaatigineqanngilaq.

Kommunip isumaginninnikkut ingerlatsinerata iluani pissutsini aalajangiisinnaatitaaneq inatsisit allat naapertorlugit oqartussaasuni allaniissinnaavoq.

Kommunip ileqqoreqqusaani kommunalbestyrelsip oqartussaasunik allanik aalajangiisinnaassusiliisinnaaneranik aalajangersagaq atuuttoq atorunnaarsinneqarpoq. Kommunip ileqqoreqqusaa oqartussaasunik kommunip

avataaniittunik piginnaatitsinissamik tunngavigineqarsinnaan-ngitsoq innersuussutigineqarpoq. Kommunalbestyrelsip nunaqarfinni aqutsisut aalajangiisinnaassusilersinnaavai, takuuk kommunalbestyrelsit nunaqarfinnilu aqutsisut il.il. pillugit Inatsisartut inatsisaanni § 3.

#### *§ 7-imut*

Aalajangersagaq peqqussummi atuuttumi § 6-mut assinguvoq, allannguuteqartitsisoqavinnissaalu eqqarsaatigineqanngilaq.

Isumaginninnikkut piorsaanissamik pilersaarusionermi kommunit suliassaat aalajangersakkakut aalajangiunneqarput. Pilersaarutit ilassaattut kommunit siunnersuusiat tamatuma kingorna nuna tamakkerlugu pilersaarusionermi tunngavigineqassapput.

Naalackersuisut kommunit piorsaanissamut siunnersuusiornerini suleriaasissat pillugit malittarisassiornissamut piginnaatinneqarput. Allaffissornikkut malittareqqusat taakku kommunit sulinerannik oqilisaassapput, aammalu Naalackersuisut suliamik ingerlatitseqqinnerannut assigiiaanik tunngavissiissallutik.

#### *§ 8-mut*

Aalajangersagaq peqqussummi atuuttumi § 7-mut assinguvoq. Allannguuteqartitsisoqavinnissaa eqqarsaatigineqanngilaq. Paasiuminarsaaniarluni oqaatsitigut aaqqiisoqarpoq.

Siullertut aalajangersakkami aalajangerneqarpoq, kommuni aalajangiisimassasoq Isumaginninnermi Naammagittaalliuuteqartarfik naammagittaalliummut isummertinnagu. Aappassaattut aalajangiineq isumaginninnermi malittarisassat malillugit pisimassaaq, pingajussaattullu suliamut attuumassuteqartoq Isumaginninnermi Naammagittaalliuuteqartarfimmu naammagittaalli-ornissaminut sapaatit akunnerinik sisamanik piffissaqarpoq.

Oqariaaseq suliamut attuumassuteqartoq paasineqassaaq nalinginnaasumik pisortat ingerlatsineranni inatsisini suliamut attuumassuteqartumik oqariaaseq naapertorlugu.

Aalajangersakkami erseqqissaatigineqarpoq kommunalbestyrelsip aalajangiinera Isumaginninnermi Naammagittaalliuuteqartarfimmu naammagittaalliuutigineqarsinnaasoq, taamaalilluni nalornissutaasariaarutissalluni kommunalbestyrelsi sinnerlugu politikikkut imaluunniit allaffissornikkut aalajangiisoqarsimappat Isumaginninnermi Naammagittaalliuuteqartarfimmu naammagittaalliorqarsinnaasoq.

Assersuutigalugu taaneqarsinnaavoq nunaqarfimmi aqutsisut aalajangigaat inuup Isumaginninnermi Naammagittaalliuuteqartarfimmut toqqaannartumik naammagittaalliuutiginnaammagu.

Isumaginninnermi malittarisassani ataasiakkaani aalajangersagaqaraluartoq, isumaginninnermut ataatsimiititaliaq imaluunniit isumaginninnermut ataatsimiititaliami siulittaasoq aalajangiissasoq, akisussaaffik tamatigut kommunalbestyrelsimiippoq. Taamaalilluni isumaginninnermi suliassamut aalajangiineq ataasiinnaq kommunimi pissaaq.

Innuttaasoq ersarissumik tunngavigisamik tusartinneqarsimanngippat aammalu naammagittaalliorsinnaanermik siunnersorneqarsimanngippat, naammagittaalliornissamut piffissarititaasoq aatsaat atuutilissaaq ersarissumik tunngavigisamik tusartitsisoqareerpat aammalu naammagittaalliornissamik siunnersuisoqareerpat, tamatumani pisortat ingerlatsiviini suliassanik sularinnittarneq pillugu Inatsisartut inatsisaanni allassimasutut.

Imm. 2-mi aalajangersagaq Naalakkersuisut aalajangigaannik naammagittaalliuuteqartarneq pillugu malittarisassanik imaqarpoq. Siullermik aalajangersarneqarpoq Isumaginninnermut Naammagittaalliuuteqartarfik naammagittaalliummut isummertinnagu Naalakkersuisut aalajangiisimassasut. Aappassaattut aalajangiineq isumaginninnermi malittarisassat malillugit pisimassaaq; pingajussaattullu suliassamut attuumassuteqartoq Isumaginninnermi Naammagittaalliuuteqartarfimmut naammagittaalliornissaminik sapaatit akunnerinik sisamanik piffissaqarpoq.

Peqqussutissatut siunnersuutip kinguneraa isumaginninnermi malittarisassani Naalakkersuisut allaffissornikkut inaarutaasumik aalajangiisussaananerit pillugu aalajangersakkat nassaassaajuassasut. Aalajangersagaq ilanngunneqarpoq innuttaasunut aalajangiinerit taamaattut naammagittaalliuutiginneqarsinnaannginnerat erseqqissaatiginarlugu. Aalajangiinerit taamaattut tassaasinnaapput: meeqqanik inuusuttunillu ikiorsiisarneq pillugu Inatsisartut peqqussutaat malillugu meeqqanik inuusuttunillu Kalaallit Nunaata avataanut inissiineq, kiisalu annertuumik innarluutillit ikiorserneqartarnerat pillugu Inatsisartut peqqussutaat malillugu tulleriarisarnermut ataatsimiititaliap aalajangigaannik naammagittaalliuutigininnerit.

Eqqartuussivimmi suliassat nalinginnaasumik suliassanngortitsivittut siullertut Illoqarfiit eqqartuussiviinut tunniunneqartarput. Imm. 3-mi aalajangersakkami aalajangersarneqarpoq suliassani taaneqartuni Nunatta eqqartuussiviata eqqartuussivittut suliassanngortitsivittut siulliunerata, taamaammallu Ustre Landsrettimik eqqartuussiviit suliassanngortitsiviusussat aapparigaat.

Aalajangersagaq pinngitsaaliilluni angerlarsimaffimmit peersitsisoqarnissaanik ingerlatsiviup aalajangiineranik suliassamut attuumassutillit eqqartuussivimmut tunniussinnaanernik killiliinermik imaqarpoq. Killiliineq marlungorlugu avitaavoq. Ilaatigut suliassat Nunatta Eqqartuussivianut tunniunneqarnissaanut sapaatit akunnerinik sisamanik piffissaliussaqqarpoq, ilaatigullu allaffissornikkut ingerlatitseqqiffissat atorneqaaqaassapput, imaalluni aatsaat

ingerlatitseqqittoqarsinnaasoq Isumaginninnermi Naammagittaalliuuteqartarfik aalajangeereersimappat. Killiliineq Inatsisimmi tunngaviusumi § 63-imi eqqartuussivimmi aalajangiivigititsinissamut periarfissaqarluarneranut sanilliullugu isigineqassaaq.

Imm. 4-mi aalajangersagaq naammagittaalliornissamut piffissarititaasoq sapaatip akunnerinik sisamanik sivisussuseqartoq sivitsorneqarsinnaaneraniq periarfissiivoq, piffissarititaasumik qaangiineq pissuteqarsimappat pineqartumut tutsinneqarsinnaanngitsunik. Uani eqqarsaatigineqarnerupput naammagittaallior-toq napparsimasimappat imaluunniit aallaqqasimappat.

Eqqartuussisarneq pillugu inatsimmi § 3 unioqqutinniarneqanngilaq, taamaalilluni eqqartuussisut Nunatta eqqartuussiviani atorfeqartut aamma naammagittaalliornissamik piffissarititaasumik sivitsuisinnaapput.

#### *§ 9-mut*

Aalajangersagaq peqqussummi atuuttumi § 8-mut assinguvoq, allanguuteqartitsisoqavinnissaalu eqqarsaatigineqanngilaq.

Aalajangersagaq Isumaginninnermi Naammagittaalliuuteqartarfiup ilaasortassaanik toqqaasar-nermi malittarisassanik imaqarpoq. Naalakkersuisut Isumaginninnermi Naammagittaalliuuteqartarfiup ilaasortassaanik toqqaasassapput.

Isumaginninnermi Naammagittaalliuuteqartarfiup siulittaasua inatsilerituutut soraarummeer-simasuusussaavoq imaluunniit allatigut Kalaallit Nunaanni inatsisinik isumaginninnermut tun-ngasunik sukumiisumik paasisimasaqassalluni. Siulittaasup atorfimmigut sumut attuumassuteqarnissaanik piumasqaateqartoqanngilaq, inuulli illuinnaasiortuunngitsutut pituttorsimannngitsutullu isigineqarnissaa pingaarsorineqarpoq.

Tamatuma saniatigut Naalakkersuisut ilaasortat sinnerinik sisamanik toqqaassapput, taakkunanga marluk isumaginninnermi inatsisinik ilisimasaqassapput, marlullu isumaginninnerup iluani inuiaqatigiit ingerlaasiannik ilisimasaqassallutik. Naalakkersuisut inunnik isumaginninnermi suliat suliarineqarnerini aalajangiivigineqarneriniluunniit peqataasartunik ilaasortassanik toqqaasinnaanngillat. Ilaasortat assersuutigalugu tassaasinnaapput kommunini inuiaqatigiinnit qinikkatut suliaqarsimasut, inuit isumaginninnerup iluani inuiaqatigiit ingerlaasiat aallaavigalugu annertuumik suliaqartut, isumaginninnermi inatsisit pillugit ilinniartitsisut, inuit kommunit pisortaqarfiillu avataanni isumaginninnermi inatsisinik suliaqartut, inuilluunniit isumaginninnermi suliat suliarineqarnerini aalajangiivigineqarneriniluunniit peqataasarsimasut.

Naalakkersuisut Isumaginninnermi Naammagittaalliuuteqartarfiup ilaasortaasa tallimaasut tamarmik sinniisussaannik toqqaassapput.

Isumaginninnermi Naammagittaalliuuteqartarfiup ilaasortai ukiunut marlunnut atuuttumik toqqarneqartassapput. Ilaasortat arlaleriarlutik toqqarneqartarnissaannut aporfissaqanngilaq. Suliap ingerlaavartuunissaanit isigalugu tamanna naleqquttuusinnaavoq.

Imm. 2-mi aalajangersagaq Isumaginninnermi Naammagittaalliuuteqartarfiup assersuutigalugu nakorsatut suliatiqut siunnersortissarsiornissaanik periarfissiivoq. Tamanna pisariaqarsinnaavoq suliani nakorsat sularisartagaannut paasiuminaatsunut tunngasunik imaqartuni.

### *§ 10-mut*

Imm. 1-imi, 2-imi aamma 5-imi aalajangersagaq peqqussummi atuuttumi § 9, imm. 1-imut, 2-imut aamma 5-imut assinguvoq. Imm. 3-imi aamma 4-imi allannguisoqarpoq.

Isumaginninnermi Naammagittaalliuuteqartarfiup qaqugukkut aalajangiisinnaatitaaneramik imaqarpoq, aammalu qanoq aalajangeeriaaseqarnissaanik. Naammagittaalliuuteqartarfik aalajangiisinnaatitaasassaaq ilaasortat ikinnerpaamik pingasut najuukkaangata. Naammagittaalliuuteqartarfik amerlanerussuteqarnikkut aalajangiisassaaq, aammalu taasinerit amerlaqatigiitsillugit siulittaasup taasibera aalajangiisusassaaq.

Aalajangersakkakut aalajangerneqarpoq Naammagittaalliuuteqartarfiup aalajangikkani allaganngortassagai tunngavilersortassagaalu.

Aamma aalajangersarneqarpoq ataatsimeereernerit tamaasa aalajangiinerit tamanut tunngassuteqartut siulittaasup tamanut saqqummiuttassagai. Tamatuma malitsigisaanik tamanut saqqummiussinnginnermini siulittaasup inuit aqqi sumiiffiillu aqqi peertassavai aalajangiinerit kikkunnut tunngasuuneri ersigunnaarsillugit, isertuuttarialinnillu paasissutissaqarpat tamakku aamma ersissanngillat. Aalajangiineq tamanut tunngassuteqartarpoq suliassaqarfimmi aalajangersimasumi maleruagassaliortoqarneramik kingunekaruni, Naalackersuisut periusaannut ilitsersuutaannulluunniit akerliuguni, periusaasartumik nalinginnaasumik qulaajaasuuguni imaluunniit inuiaqatigiit allanngoriartornerat pissutigalugu Isumaginninnermi Naammagittaalliuuteqartarfiup siusinnerusukkut periusersartagaanik allanngortitsiguni.

Aalajangiinerit minnerpaamik kommuninut, Kommunit Nakkutilliisoqarfiannut, Kommunit Kattuffiannut, Naalackersuisunut, Naalagaaffiup Sinniisaanut, Inatsisartut Ombudsmand-ianut, Isumaginninnermi Siunnersortinngorniat Ilinniarfiannut Isumaginninnermilu Pisortat Peqatigiiffiannut nassiuunneqassapput. Tamatuma saniatigut Isumaginninnermi Naammagitt-taalliuuteqartarfiup Allattoqarfiata qinnuteqartoqarneratigut aalajangikkat tunniuttassavai.



Imm. 3-mi aalajangersakkap Isumaginninnermi Naammagittaalliuuteqartarfik sinnerlugu siulittaasup aalajangiisinaanera periarfissippaa.

Tunngaviusoq illersorneqarsinnaasoq tassaasinnaavoq isumaginninnermi tunniunneqartartunik naatsorsuinnermi taamaallaat akit tamanut saqqummiunneqarsimasut malillugit naatsorsorneqarsimappata, aammalu kommunimit naliliisimaneq pineqanngippat.

Tamanna peqqussummut atuuttumut naleqqiullugu allannguutaavoq, suliani ataasiakkaani a-ningaasat annikitsut pineqartillugit sulianilu ataasiakkaani naliliinertaqanngitsuni imaluunniit tunngaviusumik pingaaruteqanngitsuni siulittaasoq aalajangiisinaalluni.

Siulittaasup illersorneqarsinnaasumik tunngavilimmik aalajangeereernermini ilaasortat sinneri aalajangiinnermik ilisimatissavai. Tamanna peqqussummut atuuttumut naleqqiullugu allannguutaavoq, suliament attuumassuteqartunut aalajangiineq nalunaarutigineqannginnerani siulittaasup ilaasortat sinnerinik aalajangiinnerminik ilisimatitsinissaa aammalu minnerpaamik ilaasortat marluk sapaatip akunneri marluk qaangiutsinnagit piumasarippassuk aalajangiineq Naammagittaalliuuteqartarfimmut tamakkiisumut aalajangiiffigisassatut saqqummiunneqassasoq.

Allannguut imm. 4-mi aalajangersakkamut suliassat allakkatigut sularineqarnissaannik naleqqussorineqartut ilaasortanut aalajangiinissamik inassuteqaatitalerlugit nassiunneqarnissaannik periarfissiisumut atatillugu isiginiarneqassaaq. Inatsisitigut illersorneqarnissaq eqqarsaatigalugu ilaasortaq kinaluunniit piunasaqarsinnaavoq, suliassaq ataatsimiinnermi oqaluserineqassasoq. Suliassani ersarissuni aammalu suliassani suliament attuumassuteqartoq eqqarsaatigalugu tuaviortumik aalajangiisoqartariaqartillugu aalajangersakkap atornerarnerunissaa eqqarsaatigineqarpoq. Suliassat taakkuusinnaapput imm. 3-mi atuuttumi pineqartut.

Tassa imaappoq, peqqussummi atuuttumi § 9, imm. 3-imi suliassat pineqartut allatut immik-koortiterneqartut, imaalerluni suliassaqassasoq aalajangiiffiginissai nalorninanngitsunik; taakkua imm. 3-imut tunngapput. Suliassat allat allakkatigut sularinissai naleqquttuusorinartut imm. 4-imut tunngapput. Taamaalilluni suliassat ersarinnerusumik immikkoortiterneqarsinnaalissapput. Tamanna Isumaginninnermi Naammagittaalliuuteqartarfiup allattoqarfiata suleriaasaani oqilisaataassagatinneqarpoq.

Kommunip aalajangiinini kingorna allanngortippagu, taamaalilluni naammagittaalliorpoq tamakkiisumik taperseerqarluni, pissusissamisuussaaq naammagittaalliorpoq aperissallugu naammagittaalliornini attatiinnarusunneraa.

Isumaginninnermi maleruagassat malillugit aalajangiisoqarsimannginnera pissutigalugu Isumaginninnermi Naammagittaalliuuteqartarfik aalajangiisinaatitaatinagu, suliassaq pisussamut oqartussaasumut sapinngisamik

ingerlateqqinneqassaaq, tamanna pissaaq pisortat ingerlatsiviini suliassanik suliarinnittarneq pillugu Inatsisartut inatsisaanni allassimasutut.

Naammagittaalliuteqartarfik ukiumoortumik nalunaaruteqartassaaq. Nalunaarut minnerpaamik aalajangiinernik tamanut tunngassuteqartunik imm. 2-imi pineqartunik imaqassaaq. Nalunaaruteqartarnerup qaammatisiutit ukiuat malippaat.

#### *§ 11-mut*

Aalajangersagaq nutaajuvoq. Taanna suliani aalajangiinissamik nalorninanngitsuni eqaanneru-sumik suleriaaseqarnissaq siunertaralugu Isumaginninnermi Naammagittaalliuteqartarfiup kissaateqarneratigut ilanngussaavoq.

#### *§ 12-mut*

Aalajangersagaq peqqussummi atuuttumi § 10-mut assinguvoq.

Tassuuna erseqqissarneqarpoq kommunit Nunattalu Karsia tassaasut isumaginninnermi tunniunneqartartunut aningaasalersuisut. Periaaserineqartarpoq suliassat nammagassallu agguataarneqarnissaat kiisalu akiliinermi il.il. malittarisassat pillugit Naalakkersuisut kommunillu Kattuffiata isumaqatigiinniartarneri. Taamatut periaaseqartarneq immikkut inatsimmi ilanngunniarneqarpoq, imaalillugu aningaasatigut agguaqatigiisitsineq inatsimmi namminermi ersittunngorlugu. Tamaaliornikkut allannguisoqassangaluarpat tassunga tunngassuteqartut tamaasa ilanngullugit sukumiinerusumik suliaqartoqarsinnaanera qulakkeerneqassammat.

#### *§ 13-imut*

Aalajangersagaq peqqussummi atuuttumi § 11-mut assinguvoq, allannguuteqartitsisoqavinnissaalu eqqarsaatigineqanngilaq. Oqaatsitigut aaqqiisoqarsimavoq.

Isumaginninnermi Naammagittaalliuteqartarfiup qanoq aningaasalersorneqarnissaa aala-jangersakkami aalajangerneqarpoq. Inatsisartuni Naalakkersuisunilu ilaasortat akissar-siaqartinneqarnerat il.il. pillugu Inatsisartut inatsisaat naapertorlugu Isumaginninnermi Naammagittaalliuteqartarfiup ilaasortai akissarsiaqartinneqassapput, ullormusiaqartinneqassallutik aammalu angalanermut ineqarnermullu aningaasartuutaat matussuserneqassallutik.

### *§ 14-imut*

Aalajangersagaq peqqussummi atuuttumi § 12-mut assinguvoq, allannguuteqartitsisoqavinnissaalu eqqarsaatigineqanngilaq.

Aalajangersakkami aalajangerneqarpoq kinaluunniit isumaginninnermi suliat allaffissornikkut suliarineqarneranni aalajangiivigineqarneraniluunniit peqataasoq pisortanik sullissitilluni atorfeqartilluniluunniit pinerluuteqarneq pillugu pinerluttulerinermik inatsimmi malittarisassat malillugit akisussaaffeqartoq. Tamanna atuuppoq atorfik tamanit qinerneqarnikkut atorfigineqaraluarpuunniit. Tassa imaappoq aalajangersakkami aamma pineqarput nunaqarfinni aqutsisunut, kommunalbestyrelsinut, ataatsimiititalianut ataatsimiittartuutitanut il.il. ilaasortat.

### *§ 15-imut*

Aalajangersakkami aalajangerneqarput peqqussutip ulloq atuutilerfissaa aamma ikaarsaariar-nermi aalajangersakkat.

Ulloq atuutilerfissaatut 1. januar 2002 siunnersuutigineqarpoq.

Allaffissornikkut malittarisassaq peqqussutikkut matumuuna atuutiinnartussaq tassaavoq isumaginninnikkut piorsaaneq pillugu kaajallaasitaq nr. 213.

Peqqussut manna malillugu Naalakkersuisut Isumaginninnermi Naammagittaalliuuteqartarfiup ilaasortassaanik nutaanik toqqaanissaata tungaanut Isumaginninnermi Naammagittaalliuuteqartarfimmi ilaasortasut suliaminnik ingerlatsiinnassapput. Tamanna ikaarsaariarfiup ingerlane-rani innuttaasut kommunillu isumaginninnermi ingerlatsiviit aalajangigaannik naammagittaalliuutiginninnissaminut periarfissaqarnissaannut pisariaqarpoq.